

金華黃先生文集

二十



塔銘

臨川危素編次 番禺劉耳校正

龍翔集慶寺笑隱禪師塔銘

今天子至元元年太中大人廣智金悟大禪師住持大龍翔集慶寺訢公上謝事之請御史大夫撒迪公以聞 上不允遣使持 詔加釋教宗主兼領五山寺教臺臣諭 旨俾安居以終老寵錫優渥賚及其徒公不敢違詔勉受 命至正四年夏五月己丑朔乃陞堂辭衆退處東庵且援著令循本宗資次舉徑山曇芳忠公以自代俄示微疾其月二十有四日壬子委順而化六月四日辛未奉全身殯于石頭城塔院臺府暨郡邑諸司咸設祖奠於道左送者數千人八月十有六日壬申窆於塔院之後岡分爪髮建塔杭之鳳凰山下弟子密詣以師

黃學二文集卷四十二

一

法嗣穹窿住山廷俊之狀走金華山中諗于潛曰先師紹隆祖道師表人天克協

帝心光膺 聖眷宜有述以示來葉子嘗庇職太史氏且辱交于先師銘非子誰宜為敢奉狀以請潛載念師之告寂也不遠千里以所服玩來識永訣若有所屬於潛者誼不得以衰退為解謹按公諱大訢自號笑隱族陳氏唐尚書操之裔世居江州後徙南昌故今為龍興之南昌人父載母蕭氏公幼開爽授以書即成誦七歲游僧舍見佛像輒作禮瞻戀忘歸父母知不可留九歲俾去家依伯父雲上人於本郡之水陸院祝髮禮雲之徒彰上人為師尋受具戒年十七初至廬山謁開先一山萬公留掌內記既而遣詣百丈山叅晦機熙禪師一見深加器重由內記陞居記室一日詰之曰黃龍得旨泐潭領徒游山名聞

叢林及見慈明氣索汗下過在什麼處公抗聲曰千年桃核裏覓甚舊時仁師愈奇之又一日以百丈野狐話詰之曰且道不落因果便墮野狐身不昧因果便脫野狐身利害在什麼處公擬答師遽喝之自是平生凝滯渙然冰釋矣公每謂先德有云但有纖疑不到無學安能七縱八橫乃益研教典旁及儒家德流百氏之說師遷杭之淨慈仍舉公居記室出世住湖之烏回遂以瓣香為師法嗣居歲餘去游江浙間復歸淨慈一時大尊宿在父師行者咸與為忘年友嘗訪中峰本公於天目公坐語至夜半風大作勢欲裂崖石左右皆辟易公不為動中峯甚敬異焉鳳凰山大報國寺以災毀而法席空虛行宣政院倚公起其廢公既至棟宇一新而規制有加於舊土田為豪民所據者悉取而歸之丞相脫歡答刺罕公領行院事雅知公遷主中天

黃學士文集卷四十二

二

竺而寺亦以災毀不一年盡復其舊天曆元年有 詔以金

陵潛邸為大龍翔集慶寺妙東名德俾之開山公首膺其選特畀三品文階以冠法號明年驛召赴 闕入見 奎章閣

賜坐良久咨問法要對揚稱 旨因及公師傅之自於是侍書學士虞公集承 詔為晦機製塔銘既又改中天竺寺額

曰天曆永祚以表公興復之功而公之別院曰廣智亦俾虞公為書其扁榜所賜貂裘金衲衣及它貴珍服用之物悉出異數從行者預賜有差尋命使傳 旨館公於泰禧宗禋院留居浹旬勞問狎至再召見遂辭歸饑送之禮彌厚公已南還復遣使降 璽書加護香幣之頒無虛月

皇上御極待遇益隆用大臣 奏命公與百丈住山東陽輝公同校正叢林清規書成四方咸取法焉公嘗於室中問一僧

百丈野狐作麼生僧方擬進語公便打復問旁僧你道這僧好打麼僧亦擬進語師亦打云同坑無異土又一僧參次公云青州布衫重七斤即不問你道万法歸一一歸何處僧云東廊頭西廊下公云瞎漢來這裏亂說拈拄杖便打又一僧參次公以手指云釋迦彌勒文殊普賢從你腳根下過去了也僧茫然公喝去其機鋒峻峭類如此一住八年不得謝復住九年脫歡公為行臺御史大夫示族前一日往致別焉既又別一二所知款語良久逮唱滅猶力疾跌坐屬其徒以累受賜金帛作萬佛閣上報 國恩餘一無所及遂書偈而逝春秋六十有一夏四十有六所度弟子若干人得法而分居列刹者若干人四會語有錄外集曰蒲室藁公以母年高闕於勤省每自謂有媿於睦州編蒲奉親爰以蒲名室因以名其藁云公質貌魁特襟度豁

如其所為文無山林枯寂之態變化開闔奇彩爛然而論議磊落一出於正未嘗有所偏蔽虞公稱其如洞庭之野衆樂並作鑑鉢軒昂蛟龍起躍物怪屏走沈冥發興至於名教節義則感厲奮激老於文學者不能過也人以為知言初魏國趙公孟頴未識公得其文歎賞不已即命駕訪之一時賢士大夫咸慕而交焉公歸寂之日天大風雨殞之日密雲四合陰風肅然定之日城東皆雨而城西獨無沾濕之靈異之迹可徵不誣其遭逢盛際始榮終哀有不偶然者矣銘曰

昔在先朝龍潛下土獲護之居化為寶所人天四衆川奔雲聚度門巍巍公其梁柱於皇昌辰金輪御宇寵綏故舊使節旁午函香示信傳宣 天語曰以五山悉統於汝凡茲釋教汝為宗主敷求遺範用繼汝祖恩光衣被榮過袞黼匪公宿德

疇克荷負典則所存有墜必舉木鐸載揚重規疊矩單提直指
表正端緒豎立法幢作大依怙密禪 上化萬物時雨云胡
不慙訃聞當宁石頭之岡崇崇宰塔史臣勒銘垂休千古

崑山薦嚴寺竺元禪師塔銘

師諱妙道字竺元台之甯海人俗姓陳父曰某母何氏家故業
儒師生而骨氣凝重神資秀朗幼嗜學不煩師訓尤喜誦佛氏
書既而曰文字之學人皆可為吾當求之於文字之外可也善
風鑒者語其父曰此子不凡真之僧中可作長老老人皆呼為長
老兒偶患右目母攜以禱於觀音像前仰見像之右目有小蛛
窠為偈去之患隨愈父以為於佛有緣年十六俾出家依杭之
六和開化寺正嚴法師十八得度尋受具戒於大昭慶寺梵祥
律師嚴師令學百法論師曰一法不學三百法乎乃辭去徧參

黃學士文集卷四十二

四

禪門知識皆不契最後至阿育王山謁橫川珙禪師未幾延歸
侍司一日聞室中舉乾矢橛話意未解怏怏不已忽曰何乃自
為疑碍遂入見質所疑川曰汝不會耶展開兩手云那三師豁
然大悟即呈偈曰雲門乾矢橛光明照十方鄒峯纔發足五日
致到錢塘川領之顧謂衆曰再來人也由是名動叢林行輩更
相詰難每出其上會中飽參者如竹山圭東石契唯菴貫皆敬
畏之至元己丑用舉者 世於本邑之慈源寺說法嗣橫川居
六年法席鼎盛俄謝去訪高沙彌遺踪於湧泉因留止焉仙居
之紫籜山廣度禪寺久廢道俗僉言非師莫能起之郡府以為
然元貞丙申請師主寺事居五年棟宇一新仍懇荒穢之地為
田以足其食學徒全集師於土木場中接引無倦
仁宗朝有以師名上聞者被 旨住黃岩之浮山鴻福禪寺

賜號定慧立明禪師皇慶癸丑正月也寺旁民多豪橫師至無不輸誠傾嚮衆始獲安其居紫籜浮山皆古刹由師而名愈顯延祐丙辰忽若有不適於意者亟引去部使者俾有司迫之還山是夜衆悉夢師再至已而復潛歸紫籜遂往拜橫川塔於育王省嚴師於六和嚴師處之於白賁庵淨慈靈隱兩山爭欲致之俱不就會平江之東禪薦嚴禪寺虛席郡府及諸山同以疏請師補其處居四年而拂衣歸休于白賁六和雖外宗衲子來叅叩無虛日師年逾七十稍厭于煩瀆懷紫籜之幽絕乃曳杖東還送者往往泣別於江浒師責之曰衲僧家當以斯道為己任視衆散如浮雲奈何戀戀效兒女輩耶自此不出山者十有四年門人在方位外者期以師年九十會慶于膝下師聞之曰我不過明年正月半明年乙酉正月十有二日初無疾苦忽修

大方諸老及外護書囑以宗門大事且戒其叅學比丘永遠司總曰汝等從朝至暮行住坐卧起心動念皆是自家珍寶若辨真實工夫作得主宰自然與道相應任從生死變遷直是移換汝絲毫不得方名大丈夫不孤負出家學道之志庶無媿於父母師友亦不虛受佛祖慈蔭吾明日行矣汝等宜各努力無喪光陰十三日黎明沐浴更衣跌坐略叙平生始末以別衆達聰乞留偈師曰諸方到此作盡伎倆我只如常不得已援筆書偈曰佛壽八十我多九年世間情盡寂滅現前投筆而逝春秋八十有九臘五十有二龕留七日闍維目睛齒牙不壞設利尤晶熒所度弟子可田一立建塔于浮山曰歸源清字元寂建塔于紫籜曰圓明當寺住持門人惟一收設利與諸不壞者分藏焉師身不滿七尺而質貌魁偉性剛直慎許可安貧樂道不為緣

飾進退之際處之裕如日用中惟以向上事開示舉者世諦語
言不以掛口一僧問陸亘大夫見南泉云弟子家中有一片石
也曾坐也曾卧欲攜作佛得麼泉云得亘云莫不得麼泉云不
得未審意作麼生師云如人向十字街頭開箇飯店只是不許
人喫一僧問和尚教看柏樹子話並無入路師云河裏失錢河
裏漉一僧夜上方丈請益師問汝每日看什麼機緣僧云看狗
子無佛性話師云試舉看僧啟口師厲聲云夜深下去僧不會
歸堂中怨詈不已或者以告師云它向後會去在僧聞之釋然
其方便為人多此類台之郡長官某問如何是佛師云牛背上
老鴉問如何是法師云蘸雪喫冬瓜大契其意即挽師主天寧
未行而有浮山之命晚歸紫籜自號東海暮翁浙東大帥某居
嶺縣翼萬戶府時兩入山問道聞師開示深用歎服南臺御史

常公某不遠二千里來訪師發藥之留兼旬不忍去其為達官
大人所重又如此紫籜有梁昭明太子廟大德丁未歲大旱官
吏父老請雨不應師欲徙其廣神見夢於縣長吏曰為我一言
明日當雨長吏以白於師雨隨至師之道非獨有以信於人雖
鬼神亦莫之能違也故示滅之後識與不識無不盡哀師有重
拈雪竇舉古一百則頌古五十三則四會說法語錄若干卷識
者評其機用峭拔如鐵板石片云溫之壽昌禪寺住持門人法
源既結集而求太常博士柳公貫序其首以行其世司聰復以
慶元保福禪寺住持明人一如所狀師行業來徵銘潛幸及與
師接而挹其真風願以游於方內未能受法雨之餘潤懼無以
贊揚萬一而司聰之來重以前育王住山印公諸大尊宿為之
勸請不敢以鄙陋固辭銘曰

禪林之盛宗唱並傳古響復續矯惟橫川師之有聞匪聽以耳
不勞展手已得吾髓虛而善應宗通說末後一着乃其極功佛
之壽命非有數童量特以八十示世間相師多於佛奚啻九年
靈根不壞身真儼然門人所記四會有錄我銘其藏用志陵谷

筠巖律師塔銘

師諱大節號筠岩族趙氏越之會稽人幼不茹葷年二十有六
乃辭家入道得度於上虞法果寺中孚禪師尋受具戒動必中
度其祖欽律師住台之妙果甚愛重之遣從同郡花徑銛法師
為天台性具之學輒能通其大義銛見師戒行精嚴謂曰佛之
慧命寄在毗尼汝大父律中宗匠汝能於叔世光紹其宗吾道
不在茲乎師承命即日渡江依石峯印律師於杭之靈芝寺不
數年悉究其宗旨明慶吉公延致西班久之會虎岩良公嗣主

法席推居第一座演暢融明軌範峻整為衆所悅服而敬畏然
能以慈悲攝誘與物無忤出世本郡漢院支傾植什靡憚

其勤遷主松江之延恩報德寺道譽益盛屢欲謝事而其徒不
忍捨居二十有六年一旦不疾而逝臨終稱佛名不輒俄默
坐而瞑如入深定焉重紀至元之元年十月二十五日也世壽
九十僧臘六十五闍維舌根不壞函靈骨歸上虞建塔于法果
師長眉深目廣額豐頤三衣惟布日但一食人施以錢有來索
者予之無勤以故囊無留貨在明慶時寺屋以灾盡毀而師所
居蒙堂獨存明日有一卒來前言昨日救火傷吾足言訖忽不
見而凡上韋陀天神像足缺一指聞者莫不大驚師三閱大藏
行中書左丞容齋李公以師事之一日延師誦經神僧為降異
光滿室衆所共覩李公語人曰節公佛菩薩地位中人也歲大

侵浙河東西歿死者縱橫溝壑間師出衣盂之資建無遮大會
三晝夜施者不慕而集瑞應之迹尤靈而師未嘗言之蓋自雙
林唱滅世遠教分殊師異旨莫適相通師雖受持律部而兼修
念佛三昧效古人作懷淨土詩數十篇昔大智和尚嘗曰吾生
弘毗尼死歸安養平生所得惟二法門大智之後善繼善述惟
師有焉師所度弟子一清今住越之東山禪寺孫若干人其上
首明慶住持講律宗主志果狀師行業請為之銘用刊于茲碑
銘曰

佛久滅度三學殊宗卓然大智合異為同惟師承之克協其志
會二法門歸一大事發祥効瑞人天具依靈根不壞宰堵巍巍
有大苾芻為律宗主謁辭樹碑昭示所祖

四明乾符寺觀主容公塔銘

黃學士文集卷四十二

八

四明乾符寺觀主大師諱普容字太虛俗姓茅氏世為餘姚人
年十有四出家於里之嶼山又十有三年祝髮於杭之昭慶明
年受具戒於明之開化依碧溪聞公於明之延慶杭之集慶者
久之從石林介公歸延慶得止觀法門於桐溪濟公既歷四行
雪岑海公為升座說偈因以主觀事亡何返嶼山於是乾符久
廢新復半岩全公北溪謙公咸護以興造師為募施者建寺如
其舊買田六百晦有時與寺別籍作九品觀室居焉法席偶虛
江湖道俗皆冀得師補其處避不就郡人福清州判官楊某為
構精舍城東三里所白有司以聞于朝有旨賜寺額曰慈
濟且加法師號俾之開山師黽勉受命為買田三百晦有
時贍其衆而仍居乾符俄舉淨業會于慈濟與衆別明日遂別
士大夫常所住還者又明日示寂于所居之觀室春秋七十夏

四十四時延祐七年二月一日也某月某日奉全身塔于慈濟寺東南若干步所度弟子惟允法言等若干人法言既嗣住慈濟始狀其行事願刊之茲碑潛謹為之序曰師家故業儒詩禮之學厥有端緒今不言尊其教也粵自大雄唱滅殊師異旨莫適統一惟天台之傳為得其宗而學者或枯於章句有教無行師蓋病之是故一年修常坐二年修常行餘時則修半行坐非行坐凡然其頂者三藝其臂者百閱七年而四三昧以具既又集同行修大悲期一年淨土期七年寓公處士慕而與之游輒為舉東林故事四衆從之為四十八願會者座下恒數十百人所著書惟圓修要義一卷而未嘗示有證入故人無得而稱焉歲大饑且疫為粥活其不能自食者用闍維法斂送其死無所歸者今行中書左丞李公時為紹興路總管師為建普度會十

晝夜竣事若有歌謠聲同知慶元路總管府事張侯以旱告師為合同修六十人詣白衣觀世音像前肉香祈哀感瑞光如瓔珞雨三日乃止駙馬都尉潘王謁補怛洛迦山道出四明膜拜執弟子禮請主如意輪期三七日尋獲異夢益申敬事此皆世之所共稱者也昔安定梁氏蓋入天台之室矣然於其行位猶曰不可得而知也矧以潛之蒙陋未始一登師之堂其有以異夫世之知師者乎謨次其畧贊揚萬一云爾銘曰
八教所詮曰一大事孰昧其依得語失義有偉大師玄珠密契爰即身心而指定慧法網可裂行海無際一雲在空潤澤旁施世出世樂平等不二侯王順風天効瑞徒闕應迹迹莫表階位勒文焯實式告來裔

真如觀主壽公塔銘

錢唐真如觀主大師示寂後五年弟子慧炬始以狀求予銘其舍利之塔予退休之餘方掃除筆研然以師道行之尊乃予夙所敬慕而慧炬又遣使馳書踰濤江而來何敢以荒落固辭按狀師諱正壽別號松壑族姓徐氏杭之錢唐人父名某家故業儒師自髫髻之年厭處塵棄家學浮圖法於南天竺之崇恩演福寺某年從住山柳堂塘權公法師得度為沙門誦經禮佛晝夜不輟平居食不過中膾不至席嚴持禁戒彌久益堅某年玉岡潤公法師來住是山師聞妙教即立妙行道譽日廣遂陞居第一座為學者師座下恆數百人師隨機開示縱談極辨未嘗少倦江湖道俗爭欲得師出世以主法會師之母某氏賢而有識每戒之曰慎勿以住院累我師亦恪遵母訓諸方以聘弊來者皆峻拒不納而於自行之功愈加精進行四三昧終而復始

雖寸陰弗棄有施以財物者輒均分於眾而以己所得贖禽魚之屬以放生衣鉢之外絕無長物某年肇建真如觀堂於錢唐城北母亦隨喜盡出其器具以資役費堂成奉安千手千眼觀世音像於其中歲以季秋之月集十方行人修大悲懺三七日又別立普賢道場歲修法華三昧構重閣度置金書大般若經銀書大智度論於其上而闢其下為講堂以待來學師凡造佛像演經文主懺期授戒法往往感天神侍坐天雨寶福靈光瑞相變化非一莫可殫紀至正二年春二月俄示微疾語其眾曰佛涅槃前一日我當去可為我建淨土懺七晝夜以助西歸十三日沐浴更衣端坐達旦廣說觀心觀佛淨土法門以策勵學徒安然而逝十四日也世壽若干僧臘若干十九日闍維啟龕視之顏貌如生手足柔軟既而於火輪中放金色光滿高數丈

衆共覩師坐五色雲端凝然不動遺爐中古根不壞得舍利無
數其徒相與謀而起塔於觀堂之 若干步師所度弟子得其
法者曰德禹嗣主觀堂曰普曜住車溪廣福教院曰慧炬及宗
勝英辯慧寧至道主居安等今同居天竺靈山寺行法華三昧
以千日為期云銘曰

衡台之教因言以傳惟真如師匪託空言以淨信心由解起行
具四三昧圓修圓証摠持万法安住一乘乃發弘願接物利生
天神降靈寶華現瑞感應之交靡容思議化期既畢駕言西歸
萬目所瞻真身在茲昔本非來今亦非去寫以銘詩式樹摧慕
道行碑

大慶壽禪寺住持秋亭禪師亨公道行碑
有大比丘曰秋亭禪師被

今天子命住持大都大慶壽禪寺其謝事而去迨今十有四年
王公大人莫不高之學徒欲望其聲光接其辭氣而不可得今
住持臣僧顯儀實師法嗣之上首謀立石以頌其德使覽者有
所觀感而興起焉至正十年夏四月九日

上御興聖便殿翰林學士承旨臣哈刺八都兒臣拜拜以為言
制可其奏事下本院命侍講學士臣潘撰文學士臣好文書丹
別救集賢侍講學士臣期頤篆題其額臣潘謹按師名洪亨順
德之綦陽鎮孔氏子也家本業農而其父嗜讀書為善士母仁
慈而有賢行尤崇信釋氏之說一夕夢金像滿室翌日而師以
生師天稟迥異常兒自幼不茹葷飲酒每慨然懷出塵之想父
母不欲違其志七歲即令出家禮本府開元寺須公為師服勤
左右朝夕匪懈性醇厚而言簡樸人未嘗見其喧譁戲笑年二

十得度受具偏游講肆微言奧旨無所不達謂單提直指乃向上宗乘之捷徑遂至京師謁西雲禪師安公於大慶壽寺一見輒加賞識命入室侍香師勤於咨決雖示以可責畧無動色西雲大奇之傳衣而付法焉西雲唱滅師法兄北溪禪師延公嗣領其衆首命師主城西之廣福寺居歲餘挈瓶錫南游襄漢江淮間凡名山巨刹大善知識無不與之相叩擊而究其旨趣會于大同還駐竹林寺未幾復歸休于慶壽尋以北谿命主彭村之觀音院垂及五年四衆傾慕施者至集大殿丈室門廡咸為之一新北溪退席法兄魯雲禪師興公繼之命於第一代立冥禪師法座秉拂拈香開堂演法出世住持奉聖州之保寧寺甫四年信嚮者愈衆魯雲逝而師以公舉補其處亦止四年小大之務靡不盡心策厲其徒多成法器俄一日大書偈曰和南上

禮諸高德別請他人拯釣舡書畢投偈于地芒鞋竹杖出門徑去衆皆大驚奔走求之不得或報師隱于文明門外一小院兩班執事率衆歡迎師不為起再書偈曰策杖腰包歸去也再來不值一文錢衆莫知所為乃相率於宣政院遣客省使詣師挽留之仍詢以遠引之故師曰祖師有云三年不去五年不住此乃從上流傳之遺風客省使還院白其事皆歎曰去富而就貧真所謂高僧也太師右丞相秦王伯顏在中書亦遣官再三勸請度不可強乃聽其所之師遂歸隱于順德之開元寺足不出戶者踰十年顯儀既被上旨來補其處乃遣迎致神師於故所住觀音院以便展省師年垂七十耳聰目明住世歷劫未易量也所度弟子勝喜勝寧等若干人嗣其法者今慶壽顯儀及永平開元住持某等若干人惟慶壽實四方禪師宗列刹之

首 朝廷嘗刻玉為印以賜之崇階顯位之所加後先相望
當路知師雅意謙退第奏請降 旨賜號某大禪師其高風
遠致槩可想見而臣潛起自衰退久竊寵榮顧何足以知師受
詔書辭無任媿懼其銘曰
巍巍人師祖道是承兼善三學實為一乘精求博訪立機密契
燈皆同明海無異味推其自利用以利他雲奔川湊如客赴家
功成身退拂衣遠舉蟻聚鱗集如兒失母四衆攀慕萬夫莫迴
迹有隱顯心非立來動也時行靜也時止出以濟物處以全己
龍象所萃人天 依鴻飛冥冥戈弋者奚為名之我隨上徽
當宁詞臣作頌清風千古

金華黃先生文集卷第四十三

臨川危素編次 番易劉耳校正

世譜

馬氏世譜

馬氏之先出西域聶思脫里貴族始來中國者和祿采思生而英邁有識量慨然以功業自期嘗縱觀山川形勢而樂臨洮土壤之豐厚遼主道宗咸雍間奉大珠九以進道宗欲官之辭不就但請臨洮之地以畜牧許之遂家臨洮之狄道和祿采思生帖木爾越歌以軍功累官馬步軍指揮使為政廉平而有威望人不敢斥其名惟稱之曰馬元帥因以為氏帖穆爾越歌生伯索麻也里東年十四而遼亡失父母所在為金兵所掠遷之遼東久乃放還居靜州之天山瀝血求父母不得遂隱居不出業

黃學士文集卷四十三

一

耕稼畜牧資累鉅萬好施與結交賢士大夫金主熙宗聞其名數遣使徵之辭曰古者求忠臣必於孝子之門吾不逮事親何顏事君乎終不起伯索麻也里東生習禮吉思一名慶祥字瑞寧性純慤兒時侍親側如成人飲食必後長者既壯姿貌魁傑以志氣自負善騎射而知書凡諸國語言文字靡不所不通豪傑之士多樂從之游食客常數十人或勸之仕輒應之曰幸有以具甘旨夫復何求况昆弟皆蚤世我出孰與為養乎父有疾粥藥必親嘗衣不解帶疾不可為而歿哀慟幾絕廬於墓側三年母亡執喪亦如之聞者皆曰篤孝君子也金主章宗時衛紹王在藩邸召見禮賓之所陳備邊理民十餘事皆軍國之要務悉奏行焉泰和中以六科中選試尚書省譯史衛紹王嗣位始通問于我

太祖皇帝信使之副難其人衛紹王曰習禮吉思忠信而多智且善于辭令往必無辱及入見上愛其談辯而觀其器宇不凡稱歎久之因賜名曰也而添圖古控漢言能士也暨再使因留不遣使人風之曰爾國危在旦夕若屬將為虜留此則可以長保富貴荅曰國之興亡係政善惡不係勢之強弱我國無亂政爾何以知之貪利則不仁避害則不義背君則不忠出使而不報則不信誠拘留不返當以死自誓反道失身雖生何益留之三旬知不可奪乃厚禮而歸之

太祖思其賢遣內臣乙里只持國書徵歲幣且招之使來衛紹王欲遣之力辭貞祐未學挈家從金主宣宗南遷汴上再遣乙里只諭旨曰寧無歲幣必得斯人宣宗幸和議之成強遣之涕泣而言曰臣身猶草芥不足惜也苟利於國雖死不恨但以人

資敵豈謀國之道哉遂輒不行尋擢開封府判官內城之役加昭勇大將軍充應辦使不擾而事集以勞遷鳳翔府兵馬都總管判官至則舉賢才修軍政興利除害境內稱治而嘉禾秀麥瓜蓮同蒂之瑞並見民既甦息乃立學以教之四方流寓之士多歸焉元光二年秋謀報大軍將攻鳳翔行臺命清野以俟主帥素與之不協乃減其從騎行三舍而與大軍前鋒遇於澮水戰不利且戰且却將入及城伏兵遮其歸路矢盡援絕人殊死戰大軍圍之數重誘之曰我國聞公賢屢召不至今亟降是轉禍為福之機也不聽乃射其馬使不能行覲卒降之又不聽而下馬持短兵接戰將突而圍益密遂見執令軍士殺弓持滿環而脅之曰不降死矣又不聽殺者畢發矢集其身如蝟罵不絕口而死是歲冬十一月二十二日也麾下士不降而死

者數十人事聞宣宗命詞臣王鶚草制贈輔國上將軍恆州刺史謚忠愍救葬鳳翔普門寺之東二廟賜額曰褒忠事見金史宣宗本紀新史本紀雖不載而詳見于忠義傳金亡時其公族近臣之家皆羈于汴之青城

太宗皇帝聞其忠義遣內臣撒吉思不花持黃旗撫問其家得其三子俾入勤於和林

憲宗皇帝嘉之使備宿衛中統元年丞相線真內侍蒙速速引見

世祖皇帝於白馬甸上諭旨曰此也而添圖古捏之子乃父忠於主朕今官其子安有不盡力如其父乎三子曰三達曰天民曰月忽難一名貞字正臣三達性倜儻多謀略累有戰功終于中書左司郎中三子天下聞滅都失刺約實謀並居天山天民

山東諸路權鹽使從伐宋以功佩金符為太平江州等路達魯花赤二子與刺罕楊子縣達魯花赤保祿賜魁偉沈毅語言辨給嘗為湘陰州達魯花赤單騎往說左江反者悉降遷同知南安路總管府事其文學政事有傳存焉與刺罕子闕里奚斯易縣達魯花赤保祿賜子世德以國子生擢進士第今由監察御史遷中書省檢校官闕里奚斯子祖仁國子生靈璧縣主簿月忽難歷事

太宗

憲宗

世祖三朝終於禮部尚書有傳在國史茲故弗序月忽難十一子世忠常平倉轉運使世昌行尚書省左右司郎中贈吏部尚書世敬通州達魯花赤幹沙納世靖皆不仕世祿中山府織染

提舉世吉絳州判官世榮瑞州路總管世臣大都平準庫提領
餘三人皆早卒世昌四子潤同知漳州路總管府事贈河南行
中書省參知政事節入道於王屋山禮下沙場鹽司令贈浙東
道宣慰司都事淵贈江浙行中書省左右司都事世敬子開在
京倉某官世靖子岳難闡溪州達魯花赤世祿三子失里哈河
南行中書省左右司都事繼祖大都宣課提舉也里哈不仕世
吉子雅古世榮子必胡南同知興國路總管府事祝饒富池茶
監潤七子祖常進士第一人卒官御史中丞仕最顯其行能勞
烈後之秉史筆者當為立傳茲亦弗序祖義翰林國史院編修
官祖烈汝寧府知事天合祖孝祖常同年進士今為某官祖信
某場某官祖謙國子進士昭功萬戶府知事祖恭國子生禮四
子祖中某副使祖周鄉貢進士廣西廉訪同知事祖善進士河

東宣慰司經歷祖良淵三子祖元鄉貢進士市舶某提舉祖某
某路儒學教授叔清開子某失里哈二子某祖憲國子進士吳
縣達魯花赤也里哈子蘇州刺哈棗陽縣主簿雅古四子某某
某某祝饒子某祖仁子伯嘉訥祖常二子武子奎章閣學士院
典籤文子秘書監著作郎祖義子獻子國子進士舍山縣達魯
花赤祖烈子惠子高郵府知事祖中子帖木爾鄉貢進士祖周
子明安沓爾某稅使開孫猶子鄉貢進士

史官黃潛曰古之得姓者或以國或以官或以王父字所取非
一馬氏自狄道而天山則以官為氏者也黃昔臨川王安石為
許氏世譜起唐虞歷兩漢至三國而其傳緒始顯馬氏之有姓
迄今僅二百餘年故予為其世譜可得而詳焉然予觀許氏有
唐睢陽守遠伏節死難與恒州府君事正相類而臨川論盛德

必百世紀獨上推於伯夷而歎其後世忠孝之良不得與夔臯
羅虎之徒俱出而馳焉嗚呼遠之不得共夔臯羅虎並馳所遭
之時異也恒州府君名聞上國數見羅致誠使知歷數之
有歸而審于去就翊扶興運紀功大常視夔臯羅虎尚何歉乎
庸備論之以著于篇

家傳

太傅文安忠憲王家傳

王諱柏鐵木爾其先出于西域哈兒魯氏世居海牙里高祖諱塔不台當

太祖皇帝龍興之初首率其族屬從本部主阿爾思蘭可汗來覲于斡艱怯魯憐之地 上撫慰之甚至命統本族軍從卓赤察合鐸兩太子掠漢地下桓昌諸州及豐勝雲內大同等城既班師而陳其勞績賞賚彌渥遂從

太祖親征大敗金兵于野狐嶺取宣德等城追掩兵金兵直抵居庸關功最諸將被 旨以本族軍由河西隴右入關陝所過布宣威德禁止殺掠衆皆悅服還師河南復被 旨西征至延安歿于軍曾祖諱阿達台從

憲宗代宋攻釣魚山而歿祖諱質理華台備宿衛於

太祖第二斡耳朶忽蘭皇后位下

世祖皇帝建都城立宮闕以勲臣子孫俾掌門衛克稱其職有子二人長曰禿忽赤次即王之考諱曲樞幼失怙恃既長性沈靜悃悞而無華事

裕宗未及用遂為

徽仁裕聖皇后宮臣以謹厚稱

仁宗生七日選入侍于宮中而左右擁翼之其後從

仁宗時侍 母后之懷孟之雲中備殫其勞

武宗知其忠降手書獎諭賜以宮人王氏尋佐

仁宗平內難迎

武宗即皇帝位尊

母后為皇太后立

仁宗為皇太子論功拜平章政事行大司農領詹事院事未幾除太子詹事平章軍國重事進太子太保領典醫監事

仁宗嗣位拜太保錄軍國重事集賢大學士大司農領太醫院崇祥院翰林國史院典瑞監提調回回漢人司天臺事階自榮祿大夫再遷開府儀同三司勳上柱國將應國公任太保者十有八年小心慎密認認然以愛君憂國為心

仁宗特命推恩於其三代於是王之高祖贈崇仁迪慶功臣太保儀同三司柱國追封祈連王謚莊穆曾祖諱純誠懋德功臣太傅開府儀同三司上柱國追封祁連王謚康懿祖贈推誠保德輔國功臣太師開府儀同三司上柱國追封祈連王謚忠靖高祖妣伯顏忽都曾祖妣伯牙真祖妣穆忽理並追封祁連王

黃學士文集卷四十三

七

夫人仍勅集賢大學士郭松年翰林學士承旨程鉅夫勒銘于碑

仁宗嘗駐蹕和義門外指故大司徒阿失帖木兒之墓顧左右曰朕嘗學蒙古文字於司徒於心不忘曲樞之功朕所嘉尚其為治壽藏鄰于司徒之兆以表朕志辭不獲命即日相地發官帑為俛窳穴植華表列翁仲如式薨遂窆焉妣曰順國夫人撤法里有子二人長伯都次即王母夫人方娠夢羽衣神人授以大珠煜煜走掌中亟納于懷悖而遂悟王生有異質驚敏絕人至元二十二年王甫四歲從太保事

仁宗每待宴未嘗有童心日進膳羞必先主而後已尊卑之分肅如也比長寡言笑威重不撓為同列所敬憚

仁宗春秋日富倚為腹心大德九年從之懷孟尋之雲中負羈

繼屬橐鞬冒雨雪凌險阻衣不解帶脅不霑席自夜達旦未嘗
輒去左右大保持大體以總綱維王則奮智畧以應機變兩宮
恃以為安十一年

仁宗在懷孟聞國恤而內難將作夜幸王寓舍密與之謀王對
曰此事間不容髮正名舉義實在今日必先人有奪人之心可
也遂決策北行質明王從太保簡車徒環甲胄整部伍扈兩宮
倍道疾驅既至京師直入禁中都人以為自天而下王父子與
一二十大臣佐

仁宗掃除姦克廓清宮闕

武宗之入正大統王之功居多六月授王正議大夫懷孟路總
管府達魯花赤兼管諸軍奧魯管內勸農事重潛邸也尋賜以
黃金為兩二百五十白金為兩五 中統鈔三萬貫留為太子

府正

仁宗諭之曰凡東宮騎從兵器環衛庶政汝悉統之有請有賜
可否惟汝乃以上聞違有常憲王職宮禁正己以律人同僚微
有所徇即面折之不少貸胥吏懾服內外凜然

仁宗念其公忠聞陝西廉訪使郭公某有賢女實

順宗皇帝妃郭氏之兄子幼從姑氏長于宮中克有淑德遠近
侍傳 旨于妃之子 皇兄魏王以為王夫人至太二年王侍

仁宗至五臺山還京師十月拜中奉大夫陝西等處行尚書省
參知政事以陝西重鎮且東宮湯沐邑也詔諭行省凡川陝工
民二總管府官屬工技牧圉等事柏鐵木爾悉總之仍賜璽書
五給六乘傳凡事得以便宜施行者有所奏啟則馳上之王視
事未期而境內大治三年十二月召除正奉大夫太子家令凡

周於浮屠乎 上遂不往有伶人奏樂忤旨命誅之王諫曰
法者天下之平也奏樂有忤而寘重典罪大於是者將何以處
之乎乃命杖遣之八月拜翰林學士承旨知制誥兼修國史十
一月羣臣列侍于嘉禧殿 上謂王曰汝未亂事朕至今餘
三十年朕躬之安汝皆汝之力朕事之集皆汝之謀弼朕無隱
汝忠莫並汝勞莫多汝心汝績惟朕知之其以
睿宗皇帝孫鎮遠王也不 之女名失烈門者配汝以稱朕意
王再拜辭不允又命有司賜以甲第珠冠寶帶黃金千兩白金
萬兩中統鈔十萬貫尋降金虎符加大都留守兼少府監武衛
親軍都指揮使有指掌環衛官及禁廷庶政凡有所敷奏者必
先關白於王然後以聞王旦暮上側服食既御既即以賜之眷
遇雖隆王兢兢自持不矜不肆正色立朝未嘗阿諛以為容悅

蒙蔽以遂其私由是出入禁中者無敢不慎 上嘗宴文德

殿甚歡近侍乘醉請尚方衣帶王奏曰 聖主一日萬幾宴

樂宜有節今替御之臣不能諫止復乘間僥倖錫予不忠甚矣

乞追還已賜之物以待有功 上改容謝之一日 上坐

便殿問王曰求賢取士何法為上王對曰今以率勞用人何由

得才古有科舉之法 先朝嘗欲舉行而未果今宜以時述

祖訓以開賢路 上以為然即命中書議行之皇慶元年十

一月進階榮祿大夫二年二月兼大都屯田事十二月拜陝西

等處行中書省平章政事尋復留為大都留守兼職如故延祐

三年五月拜中書平章政事仍領前所兼職王首言帝王大德

睦族為先親屬諸王遠戍邊境為國屏翰廩餼匪頒雖有彝典

願陛下間遣使賜之對衣法酒以勞問焉 上嘉歎久之即

御帑藏委積工藝籍東宮具出納進退惟王是決母聽賜璽書如前王率職惟謹王之還自陝西也言致治之道人為先臣在陝西見老儒郭松年有文章議論任風憲有能聲今家居三十年矣其次若同寬甫賈文器侯伯正輩學問政事皆有可采謹具姓名以聞上嘉納即遣使驛召至闕拜松年為太子諭德尋升集賢大學士以寬甫為太子贊善文器伯正並國子博士後皆有名詹事院臣請立左右衛王諫曰兄為天子弟居東宮令中書樞密軍民之政莫大於是今復立衛自岐而二必啟嫌隙惟熟慮之

仁宗然然稱善者再事遂止聞者歎服焉仁宗常命宮臣理龍舟遊太液池供張已具王諫曰主上方勵精為治奈何以此為樂乎萬一蕩漾疎虞如社稷何

黃學士文集卷四十三

十

仁宗嘉其言而止皇太后聞之大喜厚賚以旌其直至大四年二月

仁宗即皇帝位拜王資德大夫大都留守兼少府監尋擢侍御史固辭上不允諭之曰振紀綱達耳目惟卿是賴其勿辭王乃拜命即日以臺評劾右丞相鐵木迭兒素乏人望貪墨敗官上可其奏而皇太后不直之王扣頭陳

世祖舊訓所以彰善癉惡之意卒罷之王偶盥手有執悅在側者王問汝何官曰殿中侍御史王笑曰殿中與侍御執悅可乎其人愧恐不敢復出於是紀綱大提百司悚然先是議罷僧道官王力贊之僧道來謁者皆拒不納上將以暮春之月幸香山寺王諫曰麥秀方滋千乘萬騎徒御雜還不無蹂踐農民何望願陛下端拱穆清進大臣論治道以康四海不猶愈徼福遣

使分持衣酒以賜有旨令中書賜近侍以中統鈔為貫五百餘萬王奏曰有功固不可以不賞然自陛下登大寶以來嘗頒賚矣况府庫之實皆出於民以有限之物供無窮之用民將奚堪惟陛下仰思祖宗創業之艱難以保民為務上從之而止王奏回回不速兒麻氏僻在西陲末霑聖化其俗兄弟自為婚姻敗常亂倫莫此為甚乞嚴禁以正人倫厚風俗制可其奏下有司著為令某年正旦會朝上命盡以內外進獻之物賜王辭曰臣以微才叨居政府大懼無以稱塞茲又加以重賚何以克堪願以所賜之物悉與四怯薛番直司門者以旌其勞上嘉其廉而眾懷其惠留守歲往還上京例張盛宴為費不訾王一切奏罷之集賢大學士大慈都以其弟入見獻水獺氈一上命賜中統鈔伍伯錠王諫曰一氈之微酬以

重賜四方來貢何以繼乎上笑而却之某年時巡上京欲以初秋迴鑾王諫曰

世祖往還歲有定制矧今禾稼在野乘輿所經民將廢業願陛下法舊制以惠斯民幸甚上然之遂改以八月有旨以

王長子完者篤為翰林直學士知制誥同修國史王辭曰臣父子無分寸勞忝竊非據况翰林地親職重當用名儒宿望臣男完者篤年僅弱冠臣在中書未能佐陛下任賢使能而先錄用其子何以訓百官乎上曰朕業已命之矣差長當別加任使

卿勿名辭完者篤雖拜命王終不敢令其視事王嘗侍立於便殿有弄臣用言戲之上微哂王正容而進曰臣身居廊廟

豈嬖倖之所敢戲臣受侮非所恤第恐貽笑天下耳

上亟命左右拉其人出之四年八月上諭王曰昔我

大祖皇帝肇造區夏大建宗室以為蕃屏剖符裂土錫以王爵所以培養元氣敦叙彝倫也近聞其子孫嗣襲多不以序得非翰林臣僚職其事者以私亂法乎朕念之久矣今命汝掌翰林以釐正之遂拜學士承旨進階銀青榮祿大夫兼職如故王稽圖列別本支序定如舊制國族大服 上聞之喜曰朕固知非此人不能辦也中書左丞相哈散與王同侍 上於寶慈殿哈散奏及乃者財用空虛並由賞賚之橐請自今一切毋與王曰賞有功罰有罪國之大柄若皆不與功何以勸但辦之當審不可濫耳 上然之六年八月加領章佩監事十一月加提調崇祥院事冬至日 上坐文德殿太史進授時曆王執曆指至元紀年曰 世祖混一區宇開太平無疆之基在位三十餘年政治之盛真

後世福次指大德紀年曰

成宗初政清明中邁末疾遂不復振次指至大紀元曰

武宗銳意中興惜乎天不加年次指皇慶紀元至是年曰今八

年矣 上曰延祐之治如何王懷曆對曰治否在後人議耳

上曰卿意深矣君臣當共勉之七年正月

仁宗崩王哀慟幾絕伏倚廬晝夜臨閱四十餘日未嘗少間

英宗遣近侍慰之曰卿悲痛極矣縱不顧身獨不念朕乎朕之

倚卿尤甚于

先帝也命送歸于里第日遣問焉

英宗踐祚之明日御大明殿大臣貴戚皆列侍 詔王而諭之

曰 先帝嘗囑卿於朕曰柏鐵木爾自幼事我終始于一捐軀盡瘁無有能先之者我非斯人則食不甘味寢不安席汝其

毋忘吾志言猶在耳朕不忍道茲用揚于大廷俾衆知之遂以所服珍珠七寶頂帽及御衣賜之曰先帝以卿付朕卿不

負先帝肯負朕乎凡朝政之得失其直言毋隱王受命感

泣對曰臣不朕事先帝幸無大譴今陛下上繼

先志曲垂眷注臣敢不竭犬馬之力臣竊以為聖君之初政左

右前後宜去邪任賢使聰明四達天下之幸也上曰然四月復

除銀清青榮祿大夫大都留守兼職如故王自是奮發盡言無

所迴撓而羣小有不堪者矣因構誣言浸潤日甚

英宗始不之信後乃惑之待遇益踈王不為變上亦尋悔

曰久不見柏鐵穆爾矣在廷忠厚老成之士未嘗有言其非者

殆羣小之言盡我耶朕不逮先帝之明遠矣復召見厚禮

之命仍掌環衛王見言既不用而妬寵者尚衆遂退隱于雲山

之北

英宗崩晉王入踐大位泰定元年召王復為留守王以疾

辭三年六月二十九日薨于上都西門里第年四十有五有旨

賻以中統鈔二千錠給驛護送還大都以某年某月某日葬于

城西宛平縣先塋之次王偉顏美髯自結髮至強仕終始于一

不為利誘不為威惕不好貨殖不貪祿位公不避怨私售恩聖

眷雖隆未嘗自溢知無不言言必以正初

明宗之西行也興聖諸臣定謀禁中王默言於

仁宗曰兄弟揖讓古所罕見既盡美於前矣今議傳次倘先兄

而後已庶全聖德于以正前人之緒絕他日之虞惟陛下

察之時雖不用其言而朝野服其鯁直暨

明宗入辭王復奏留燕餞而復行道途委積百兩所須皆為之

豫備

明宗問諸左右知王所為大駕南還中道詢其子孫追念不置有宗王久鎮北邊以疑似召至京師王奏皇屬至親且有功何可以無稽之言而廢之

上悟尋遣還鎮又有以異姓王行

樞密院事者或告其培克軍餉

上怒將置諸法王奏國初

其人父子數立大功今在邊陲馭車有法遠人畏之奈何自撤藩屏上即命釋之後遣其子齋重寶為謝王斥去不與語初作西宮卒從服役者數千人廩食不繼有一卒至宮闈西食以闌入為衛士所執上命王訊之王奏曰卒雖可罪而實以飢故情有可矜乃贖其罪并餘卒悉放還營仍著令役者以歲更而給其衣糧宿衛閹人按籍輪直而官無廩給王為奏增冬衣日餼自是免於飢寒之舌相率繪王像而祠焉故平章政

事趙公世延為中執法時嘗與右丞相鐵木迭兒會

英宗在諒闇中復出據相位遂大獄以事報復趙公以王力救而免王未嘗與人言及王薨趙公致奠甚哀人始知之其知國體識時務陳善閉邪為世所稱道者如此至于謀猷之大籌策之良左右密勿則有非衆人所得而聞矣觀夫皇慶延祐之治則君臣一體明良際會王平昔所以格君之心者可知也太保之屬疾也王治湯藥時寢興不少懈及疾不可為治喪尤謹族人欲守本俗王不可曰罔極之恩既以無報今居乎中國獨不可行先王之禮乎不然是不以禮待吾親也躬衰經居倚廬哭桶以節薦奠以時後居內憂亦如之遂世守為家範則王所以盡為人子之道者可知也不亦忠孝兩全矣乎蓋王天性超邁德量恢弘故其所守所行有不待強學而自與古人暗合者

宜乎光輔 累朝 世祿克著令名於當時也且我朝大
統幾傾而復正者皆

仁宗之力一二肇謀其事之臣與王之功豈在攻城野戰建事
立功者之下乎王次男蠻子以才行歷官華要綽有能聲微聞
朝著

今上皇帝追念其先烈始詔中書議王父子恤典同日五制並
下王之考大保應國公贈推忠翊運保寧一德功臣太師開府
儀同三司上柱國追封廣陽王謚忠惠妣順國夫人追封廣陽
王夫人王贈宣忠濟美協誠正德功臣太傅開府儀同三司上
柱國追封文安王謚忠憲王妻魯國夫人追封文安王夫人齊
國太夫人封文安王夫人

太皇太后亦命翰林學士歐陽玄贊王畫像至正元年上復特

勅立制為王神道碑銘俾翰林學士承旨夔夔中書左丞許有
壬書篆以賜其家於是距王之薨已十有六年矣君子是以知
王父子積累也厚有 昌其祚消至於事久論定而天道之昭
昭有不可掩遏者矣忠惠王之兄禿忽赤未任而卒後以子貴
贈純誠保德濟美功臣太傅開府儀同三司上柱國追封安成
王謚忠簡先是莊穆 從

太祖攻居庸關有功遂以所統哈兒魯軍世守居庸之北口
仁宗特命升其萬戶府為隆鎮衛降銀章金虎符以忠惠王為
都指揮使忠惠王以身居保傅力辭乃以忠簡王之子衆家為
指揮而世襲其職王之 伯都由翰林學士三遷遙授中書平
章政事擢侍御史尋拜中書參知政事進右丞沒贈克勤智義
佐運功臣金紫光祿大夫行中書省左丞相上柱國追封趙國

公謚安肅王初娶唐兀氏奴倫某達魯花赤伯家奴之女由魯國夫人追封父安王夫人者也再娶郭氏

仁宗命以為配由齊國太夫人特封父安王夫人者也守節教子人稱其賢三娶鎮遠王之女失烈門亦

仁宗所命前卒子男三人長完者篤唐兀氏夫人出由翰林直學士亞中大夫遷秘書卿次道童王故所娶高麗氏子今右藏庫提點次蠻子郭太夫人出今為資德大夫江浙等處行中書省右丞溫恭明敏好學篤行事母以孝聞居官以廉稱娶乃蠻氏奴罕卒繼高昌氏答兒麻失里並封范陽郡夫人女三人長哈克納適鎮遠王之子幹失帖木兒卒次金剛奴適崇福司少卿答兒麻失禮次八寶適衛王寬徹班孫男四人惟王有傳在太史氏然所書皆關於國家之大事而微言細行有不勝

書者且藏于秘宇閱者有禁今倣昔人家傳之法采輯行狀神道碑撰次如右庶幾百世之下有所鑒觀而思濟其美焉

梅孝子傳

梅孝子者名應發居吳郡閭門市中不由學問而知人之行莫大於孝行之必盡其誠蓋天性然也母有疾醫不能療則剔股肉以食之疾良已它日母又有疾危甚更求良醫投以藥皆弗效莫知所為乃露立北面稽首以名香然頂灼臂叩天乞減已年以益母壽是夕天將雨陰雲四合俄剗焉而開若啟半扉盡見北斗之六星惟一星及輔星不見頃之雲復合而合天深黑及還至母所則母已擁衾坐床上言有衣白衣者六人以水來灌灑遂霍然而蘇不覺疾之去體也詰旦母平復如常時今年已八十餘身愈康強四方士大夫多為詩美其事蜀郡虞公為之序云

金華黃潛曰曾子固氏有言古今豪傑士傳論人行義不列于

史者往往務撫奇以動俗亦或事高而不可為繼或伸一人之善而誣天下以不及雖歸之輔教警世然考之中庸或過矣以予所聞梅氏子事談者誠近於過夫欲使中人以下觀過知仁耻躬不逮則載而傳之曷可已哉

黃節婦傳

節婦蔡氏者節黃君天驥妻也黃君之先閩人六世祖龜年宋高宗時為殿中侍御史論罷右僕射秦檜累遷給事中及檜再相遂以貶去隱于鄞其後子孫多為美官至黃君迺弗仕節婦年十八歸黃君明年有子曰傳孫甫時黃君死又明年其舅亦死節婦屏華采服艱勤以奉其姑以保其孤子三十餘年猶一日家既裕而姑已老子亦能自樹立所與為師友多顯者由是知名得察舉補儒學官節婦之名亦因以著聞有司上其事于

中書用例旌表所居及其里門曰孝節云

金華黃潛曰予讀詩至柏舟未嘗不歎古女婦之賢傳於今者少也共姜之名由詩以顯得孔子而詩益傳女婦之以義自守獨共姜邪世無孔子若蔡氏者非尊官要人為之引重惡能彰彰如此閭巷之人砥行立名堙滅而不稱者可勝道哉可勝道哉

金華黃先生行狀

先生諱潛字晉卿姓黃氏黃為婺名族至宋太史公庭堅族望尤著太史之從父昉生景珪俱來浦江景珪生琳娶忠簡宗公澤之女弟始遷於義烏琳生中輔力學尚氣節當秦檜柄國士有議己者輒捕殺猶奮然題樂府太平樓上有劍欲斬佞臣頭之語人至今誦之晚以轉運使薦當得官命垂下而卒中輔生紹祖紹祖生伯信於先生為高祖迪功郎累贈朝散大夫妣宗氏忠簡公四世諸孫女累封安人曾祖夢炎淳祐十年進士仕至朝散大夫行太常丞兼樞密院編修官兼權左曹郎官以朝請大夫致仕妣陳氏累贈宜人繼方氏祖塢方出也以進納恩補承節郎入國朝弗仕今累贈嘉儀大夫禮部尚書上輕車都尉追封江夏郡侯妣徐氏淳祐七年進士奉議郎兩淮宣撫大

使司幹辦公事彬之女今追封江夏郡夫人父鑄以朝請府君遺澤補將仕郎今累贈中奉大夫江浙等處行中書省參知政事護軍追封江夏郡公妣童氏承信郎監嘉興府鮑郎鹽場伯永女今追封江夏郡夫人夫人姓先生時夢大星煜煜然墜於懷歷二十四月以至元十四年冬十月一日始生甫晬即自免乳徐夫人抱而育之比成童不妄踰戶闕授之以詩書不一月皆成誦迨學為文下筆頃刻數百言常著帛諸葛武侯辭前大學內舍劉君應龜朝請府君之外孫也見而嘆曰吾鄉以文辭鳴者喻叔奇兄弟爾是子稍加工不其與之抗衡乎因留受業弱冠西遊錢塘前代遺老與鉅公宿學先生咸得見之於是益聞近世文獻之澤暨還故居從仙華山隱者方君鳳游為歌詩相倡和絕無仕進意其友葉君謹翁力挽之出大德五年舉教

官七年舉憲吏就試皆中其選已而復退隱於家延祐元年貢
舉之法行縣大夫又強起先生充貢鄉闈時古賦以太極命題
場中作者往往不脫陳言獨先生詞致淵泳綽然有古風特真
前列二年上春官復在選中及奉大對惓惓以用真儒行仁義
為言辭甚剴切讀卷者以其頗涉於激綴之末第奉上旨賜同
進士出身主選吏以為白身補官散階當下二等上命特與對
品階授將仕郎台州路甯海縣丞僅踰再期會有詔改鹽法江
浙行中書承制遷兩浙都轉運鹽鐵使司石堰西場監運事聞
命仍舊階居其職閱四載以功超一資陞從事郎紹興路諸暨
州判官至順二年用故御史中丞馬公祖常之薦入為應奉翰
林文字同知制誥兼國史院編修進階儒林郎丁外憂去官服
闋轉承直郎國子博士經六年之久請補外換奉政大夫江浙
等處儒學提舉至正三年春先生始六十有七不俟引年亟上
納祿侍親之請絕江徑歸俄有旨命預修遠金宋三史丁內憂
不赴除服以中順大夫祕書少監致仕居四歲故湖廣行省平
章公朶爾直班令中書左丞相太平開府公力交薦之被上旨
着致仕仍舊階除翰林直學士知制誥同修國史同知經筵事
進階中奉大夫九年夏四月游上章求歸田里不俟報而行上
聞之遣使者追及武林驛敦迫還京復供前職十年夏四月始
得謝南還行中書為言於朝給以半俸終身公牘已具而未及
上十七年秋七月今江浙左丞相金紫公達世貼睦邇方承制
司黜陟之柄移書起先生咨議省事以疾力辭閏九月五日薨
於繡湖之私第享年八十有一學士大夫聞之俱流涕曰黃公
亡矣一代文章盡矣門弟子劉涓王禕宋濂傅藻等咸來相治

後事以是月十八日葬於縣東北三里崇德鄉東塋之原距嘉議府君之墓僅十步娶王氏嘉熙二年甲科進士從事郎照慶軍節度掌書記困金之曾孫文林郎監沿江制置副使司造船塲沂之孫將仕郎桂之女今累封江夏郡夫人先一年卒及是始合葬焉子男一人梓用蔭入官初授忠顯校尉紹興路同知餘姚州事女一人適惠州學正陳充讓俱先卒孫男四人瑄琛璵珣所著書有日損齋初藁三卷續藁三十卷義烏志七卷筆記一卷傳學者先生在甯海時縣地瀕于鹽塲而亭戶恃其不統於有司肆毒害民民不敢正視編氓之隸漕司洎財賦府者亦謂各有所憑橫暴尤甚先生皆痛繩以法吏懼以利害白弗顧也有後母與僧通而醜殺其夫者反誣夫前子所殺獄將成先生變衣冠陰察之具知其姦偽卒直其寃遠近以為神明巡

兵捕鹽販者急遂沈鹽於河帥衆以拒巡兵怒乃取他私販事以實之民有在盜籍者謀為劫斂未行邑大姓執之以圖中賞格初無獲財之左驗事皆久不決先生為之疏剔以其獄上各論如本條免死者三十餘人部使者董君士恒行縣廉知先生有治狀事悉諉焉先生為黜其以賄敗者上百戶一人縣吏二人在官無祿者四十餘人愚民以婚田鬪競往訴咸下其狀多至數十百先生錄其當問者即不當問者遣之先生明習律令世以法家自專者有弗如也凡經其論定翕然畏服不敢重有辭歲大旱禱於靈湫有白龍蜿蜒見湫中已而黑雲四興大雨如注縣以有年在石堰視亭塲為尤躋居是居官者常以秤盤拆閱及不能檢防私鬻被譴先生規措有法無毫分入於吏議在諸暨其俗素號難治先生不加鄙棄壹導以善政民多從化

捕盜司屋壞撤而改作無敢後期巡海官舸例以三載一新費出於官而責足於民有餘則總其事者私焉先生適蒞是役樽節浮蠹以餘錢還之爭驩呼而去奸民以偽鈔鈎結黨與脅攘民財官若吏聽其詐挾之以往新昌嵯縣天台甯海東陽諸縣株連所及百餘家民受禍至慘郡府俾先生鞠治一問皆引伏獄具官吏除名同謀者各杖之有捕盜卒陰寘偽鈔板於良民家乃白於官往索之惡少年持梃從者近百人先生過於野詰從吏曰弓卒額止三十安得此曹耶可縛送於州聞者遁走有盜繫錢塘縣獄游民賂獄吏私縱之假署文牒發兵來為向導逮捕餘二千餘家先生疑而訊焉悉得其情以正盜宜得重議持偽文書來者又非州民俱械還錢塘誣者自明奉省檄監稅杭州先生御之以寬商旅四集僅閱三月增錢十二萬緡有奇

在成均視弟子如朋友未始以師道自居輕納人拜而人來受學者滋益恭業成而仕皆有聞於世時人欲增設禮殿配位四配位合東坐而西向學官或議分置於左右同列不敢爭先生獨面折之其人恚甚日坐堂上以危語相加御史惡其無禮逐去之乃克如先生言在禁林修會本朝后妃功臣傳先生為條陳義例多所建明士類服其精允進講經筵者三十有二經筵無專官曰領曰知咸宰執近臣講文之述率屬先生訂定非有關於治道之大者不敢上陳其啟沃之功為多上嘉其忠數出金織紋段賜之始先生嘗預考江浙江西上都鄉試江浙則三往而一主其文衡至是被上旨考試禮部尋又為廷讀試讀卷官前後所甄拔者盡知名之士先生天資介直絕不事造請逢覃官者一減資者五銓曹或失於收叙亦不自言在州縣間唯

以清白為治一錢不受於民所至無圭田月俸弗給每鬻產以佐其費及升朝行挺立無所附足不妄登鉅公勢家之門君子稱其清風高節如水壺玉鑑纖塵不污先生性篤孝於親親歿營塚於三釜山有乳虎馴狎之異山去所廬十里月旦望必展省大暑寒不易先世遺文歲久或有殘缺極力搜訪補綴成編家居不談米鹽細務與公府短長邑長吏來謁鄉鄰有急覲得片言為援輒峻却之尤不輕於薦引或譏其絕物先生諭曰公朝爵祿將以待賢者豈為吾私親設哉先生貴而能貧雖位至法從蕭然不異布衣時又寡嗜慾甫臨強仕之年即獨榻於外給侍於左右者二蒼頭而已遇佳山水則觴詠其間終日忘去其冲曠簡遠之情使人挹之鄙吝頓消與人交任真無鈎距不事矯飾以為容悅而誠意獨懇至然剛中少容觸物或徂急霆

震若未易涯涘不旋踵間煦如陽春曾不少留礙焉先生之學博極天下之書而歸於至精有問經史疑難古今因革與夫制度名物之屬旁引曲證語蟬聯不能休至於剖析異同讞決是非多先儒之所未發見諸論著一本乎六藝而以羽翼聖道為先務然其為禮體布置謹嚴援據精切俯仰雍容不大聲色譬之澄湖不波一碧萬頃魚鱉蛟龍潛伏而不動淵然之色自不可犯中統至元以來如先生者二三人而已故凡國家典冊詔令及勲賢當得銘者必命先生為之海內之士與浮屠老子之流以文為請者日集於庭力麾之而弗去一篇之出家傳人誦雖絕域殊邦亦皆知所寶愛雅善真草書人有得其片幅者必藏弄之以為榮世之評議者謂先生為人高介類陳履常文辭溫醞類歐陽永叔筆札峻逸類薛嗣通識與不識僉無間言嗚

呼先生生當六合混一之時鍾河嶽英靈之氣積之既厚所用亦弘仁皇肇開科舉之初即以儒學自奮歷仕五朝晚乃入侍今天子掌述帝制勸講經帷疑然獨任斯文之重天下學士咸所師法遂使有元之文章炳耀鑑錫直與漢唐侔盛先生之功固不細矣至於出處大節尤人所難能者年未七袞而謝事暨群公力薦起之俄復控辭上方眷待之深再召還朝未幾又辭其難進易退之風真足以廉頑而立懦揆之古聖賢之道蓋無媿也若先生之所自立者豈不綽綽可傳於後哉先生之薨在法當錫諡立傳某從先生游垂二十年知先生為最深因輯任官行事為書一通上於太常國史然巨細詳記不敢效古書法為簡嚴者欲其事之白以俟芟撫也謹狀至正十年十月一日門人金華宋濂狀

圖書在版編目(CIP)數據

金華黃先生文集〔元〕黃潘撰.—北京:北京圖書館出版社,2005.5

(中華再造善本)

ISBN 7-5013-2698-3

I. 金… II. 黃… III. ①古典詩歌—作品集—中國—元代②古典散文—作品集—中國—元代 IV. I214.72

中國版本圖書館CIP數據核字(2005)第021210號

ISBN 7-5013-2698-3



9 787501 326983 >

書名 金華黃先生文集(全二十冊)
著者 〔元〕黃潘 撰

出版 北京圖書館出版社(100034 北京市西城區文津街七號)

Tel:(010)66151313 Fax:(010)66174391

E-mail: Bistxb@nlc.gov.cn

Website: www.nlcpress.com

印刷 金壇市古籍印刷廠

開本 八

印張 二二五·七五

版次 二〇〇五年五月第一版第一次印刷

印數 一·一〇〇

書號 ISBN 7-5013-2698-3 / K·1032

定價 七二·三〇圓

